

## И абие поем тропари сия, во глас 5:

**Благословен еси, Господи, / научи мя оправданием Твоим.**

**Ангельский собор удивися, / зря Тебе в мертвых вменившася, / смерти же, Спасе, крепость разоривша, / и с Собою Адама воздвигша, // и от ада вся свободждша.**

**Благословен еси, Господи:**

**Почто мира с милостивными слезами, / о ученицы, растворяете? / Блистаяся во гробе Ангел / мироносицам вещаше: / видите вы гроб и уразумейте, // Спас бо воскресе от гроба.**

**Благословен еси, Господи:**

**Зело рано мироносицы течаху / ко гробу Твоему рыдающия, / но предста к ним Ангел и рече: / рыдания время преста, не плачите: // Воскресение же апостолом рцыте.**

**Благословен еси, Господи:**

**Мироносицы жены, с миры пришедшия / ко гробу Твоему, Спасе, рыдаху, / Ангел же к ним рече, глаголя: / что с мертвыми Живаго помышляете? // Яко Бог бо воскресе от гроба.**

**Слава, Троичен:**

**Поклонимся Отцу, / и Его Сынови, и Святому Духу, / Святей Троице во Едином Существо, / с Серафимы зовуще: // Свят, Свят, Свят еси, Господи.**

**И ныне, Богородичен:**

**Жизнодавца рождши, / греха, Дево, Адама избавила еси, / радость же Еве в печали место подала еси: / падшия же от жизни / к сей направи // из Тебе воплотивыйся Бог и Человек.**

**Аллилуиа, трижды.**

**Таже ектения малая.**

**Возглас: Ты бо еси Царь мира, Христе Боже наш, и Тебе славу возсылаем, со Безначальным Твоим Отцем, и с Пресвятым и Благим и Животворящим Твоим Духом, ныне и присно, и во веки веков.**

**И поем седален дне, глас 1.**

**Подобен: Гроб Твой, Спасе:**

**Плащаницею чистою и ароматы Божественными/ Тело Честное, испросив у Пилата,/ Иосиф миропомазует и полагает в нове гробе./ Темже утру пришедша,/ мирносицы жены возопиша:// покажи нам, якоже предрекл еси, Христе, Воскресение.**

**Слава, конец.**

**И ныне, другой подобен:**

**Ужасошася лица Ангельстии,/ зряще Седящаго в недрах Отчих:/ како, яко мертв, во гроб полагается Безсмертный!/ Егоже чини Ангельстии окружают/ и славят с мертвыми во оде,// яко Зиждителя и Господа.**

**Таже бывает чтение во Евангелии толковом, от Матфея, зачало 114: Во утрий же день, иже есть по пятце:**

**Воскресение Христово: не глаголем. Но абие псалом 50:**

Помилуй мя, Боже, по велицей милости твоей, и по множеству щедрот твоих очисти беззаконие мое. Наипаче омой мя от беззакония моего и от греха моего очисти мя; яко беззаконие мое аз знаю, и грех мой предо мною есть выну. Тебе единому согреших и лукавое пред тобою сотворих; яко да оправдишися во словесех твоих и победиши, внегда судити ти. Се бо, в беззакониих зачат есмь, и во гресех роди мя мати моя. Се бо, истину возлюбил еси, безвестная и тайная премудрости твоя явил ми еси. Окропиши мя иссопом, и очищуся; омыеши мя, и паче снега убелюся. Слуху моему даси радость и веселие; возрадуются кости смиренныя. Отврати лице твое от грех моих и вся беззакония моя очисти. Сердце чисто созижди во мне, Боже, и дух прав обнови во утробе моей. Не отвержи мене от лица твоего и дха твоего святого не отими от мене. Воздаждь ми радость спасения твоего и дхом влчним утверди мя. Научу беззаконныя путем твоим, и нечестивии к тебе обратятся. Избави мя от кровей, Боже, Боже спасения моего; возрадуется язык мой правде твоей. Господи, устне мои отверзеши, и уста моя возвестят хвалу твою. Яко аще бы восхотел еси жертвы, дал бых убо; всесожжения не благоволиши. Жертва Богу дух сокрушен; сердце сокрушенно и смиренно Бог не уничижит. Ублажи, Господи, благоволением твоим Сиона, и да созиждутся стены Иерусалимския; тогда благоволиши жертву правды, возношение и всесожегаемая; тогда возложат на олтарь твой телцы.

**И поем канон, ирмос по дважды, тропари на 12: и паки последи ирмос оба лика вкупе. Есть же канон, от первыя песни до шестыя, творение Марка монаха, епископа Идрунтскаго: ирмосы же творение жены некия, Кассии именуемая. От 6-я же песни до конца творение господина Космы. Краегранесие же канона: Каи симерон де Савватон мелпо Мега. Сиесть: И днесь же Субботу пою Великую. Глас 6.**